

## I yu'xarij ti hua'puaj a'ín ti jo'yú'xaca' i San Pedro

### *Pedro pu hua'tyojtye'*

<sup>1</sup> Nyáaj Simón i nyaj Pedro pu'éen, i nyaj jahuiire' i Ciríistu' ti ajta Jesús pu'éen, a'yaa nu já'muatyojtye' mu siaj a'yan cha'taj siana'aj tyá'tzaahuatye' tyati'ij ityáj, ji'nye i Dios ajta a'íjna Jesús ti ajta Ciríistu' pu'éen, a'íi mu jì'réenya'aj séejre'.

<sup>2</sup> Che' jéehua tyajamuáaci'tyij i ti jin tyámua' tyajamuatá'caa, ajta ti'ij jamuaatyápua'ritye'en a'íjna jime' siaj jamua'tyej i Dios siajta a'íjci i Jesús i ti ajta tavástara' pu'éen.

### *Je'ej ti tyi'huóoxie've' a'íjma jimi i Dios ti huo'tajé*

<sup>3</sup> A'íjna i ti jin néijmi'i putyí'uurej i Dios, a'íj pu jin tyitaatá' néijmi'i i ti tyúuxie've' tyej tyij júurij huatyá'itzeere'en a'íjna jimi i ti taatajé, a'íjna i ti jusén jin naa huasé'rin, ajta a'ín néijmi'i jin antyúumua'reej.

<sup>4</sup> A'íj pu jitze ma'can i ti jin va'cán tya'tóoraj taatajé, ti ajta jéehua tajitzé juxie've', tyej tyij a'íjna jin a'yan séeria'aj tá'ra'nyij ti'ij i Dios, tyata'aj tyij huatáta'uunaj a'íjci jimi i ti je'ej pua'aj huasé'rin i maj jin a'yan tyá'xie've' úyan cháanacaj japua.

<sup>5</sup> A'íj xu jin jéetze' huatyóoca'nyej a'íjna jime' i siaj jin tyá'tzaahuatye' siajta tyámua'

tyityetyúucha'íij, siajta tyámua' tyiyo'itéej xá'ra'nyij i siaj jin tyámua' tyityetyúucha'íij.

<sup>6</sup> Siajta i siaj jin tyámua' tyá'mua'reej, a'íj xu jin huóocu'vej, ajta i siaj jin óocu'vej a'íj xu jin néijmi'i tyo'táviicue', ajta i siaj jin néijmi'i tyo'táviicue', a'íj xu jin tyaatatyójtzi're'en i Dios,

<sup>7</sup> ajta i siaj jin tyé'tyójtzi're' i Dios, a'íj xu jin tyámua' tyityetyóojeevej, ajta siati'íj tyámua' tyityetyojéeven aj xu sij tyámua' naa tyityahuóoxie've'en.

<sup>8</sup> Típua'aj mua'aj néijmi'i jin a'yan xáarinyij je'ej siaj tyi'íj tyu'yí'tin, a'íjna i ja'mua júuricamej jéehua pu tyu'tyáhuüre'ej a'íjna jime' siaj jaamua'aj tzáahuatyí'ra'aj jime' i tavástara' Jesús ti ajta Ciríistu' pué'een.

<sup>9</sup> Ajta a'íjna i tiquee a'yan ricij a'yaa pu een ti'íj i a'tíj ti arácun tiquee imuáj tyí'sej, a'íi pu arí yo'huá'xij ti i Dios tyaatú'uunyi'ri' je'ej ti tyi'tíj jin quee xá'pui' huaríj.

<sup>10</sup> A'íj xu jin nye'ihuáamua', siata'aj huatyóoca'nyej siaj sij a'yan huárinyij je'ej ti tyi'tíj jin i Dios tyajamuaatajé ajta jamua'antyíhuoo, ji'nye típua'aj a'yan xáarinyij caxu a'náj tyi'tíj jin ootyá'itzeere'ej.

<sup>11</sup> A'yaa pu tyajá'muaci'tyij, siaj a'áa jo'tyájrutyey jo'tíj jusén jime' tyejé'ijtaj i tavástara' i ti tajapúa huatanyúj, a'íjna i Jesús ti ajta Ciríistu' pué'een.

<sup>12</sup> A'íj nu jin a'yan tyajá'mua'ixaatye'ej na'mej, siaj sij a'yan tyá'mua'reeriaj, tyij siajta seríj tyámua' een a'yájna nyati'íj tyajamuaamuá'tyej.

13 A'yaa pu tyí'nyaci'puaj nyej nyij tyámua' tya-jamuáa'ixaatye' nyajta ca'nyíjra'aj jamuaata'an ijíij nyej nyooj júurij.

14 A'íjna i tavástara' Jesús ti ajta Ciríistu' pué'een, a'yaa pu tyinaaté'exaaj ti arí véjri' a'náj nyaj jitzán muí'nyij,

15 A'yaa nu nyij tyu'tyényaca'nyesij, nyej nyij tyajamuáa'itíij ti'ij huatái'riitarej siaj jo'támua'reej je'ej nyaj tyajamuáa'ixaa.

16 A'íjna i tyaj jamuaamua'tyej je'ej ti éenye'que' huataséjre'sij a'íjna i tavástara' Jesús ti ajta Ciríistu' pué'een, a'ájna xicáara' jitze ti'ij ajtáhua'aj yava'cányesij, catu a'íjna jin jaataxájtaca' i nyúucarij i maj jujímua'aj mana'aj jájtyo i tyétyacaa, catu tyajta tajímua'aj tyana'aj jájtyo, sulu taji'ij tu jin jaaséj ti a'íin néijmi'i jin antyúumua'reej.

17 A'yaa tu tyeeséj ti'ij i Dios tyámua' ty-eetyájtoo, ajta tyámua' tyaatá', ajta i Dios a'yan tyu'taxájtaca' tíjin: "A'íi pu a'íin pué'een i nyiyóoj i nyaj jéehua huápu'i'ij jaxie've', a'íi pu a'íin pué'een i nyaj ja'antyíhuoj."

18 Ityáj tu jáanamuaajri' a'íjci i nyúucarij ti jútye' je'cánamuajre, ji'nye jamuán tu ajo'tyú'uuca'aj i tavástara' a'ájna i jiríj jitze ti tyámua' tyejé'een.

19 A'íj pu jin jéetze' ámiteere' quee a'íjna i nyúucarij i maj jaataxájtaca' a'íimaj i maj Dios jitze tyí'xajtaca'aj, a'íj xu jin mua'aj tyámua' tyá'tzaahuatye'. Ji'nye a'íjna i nyúucarij a'yaa pu een ti'ij a'íjna i tatzárij jo'tij jo'tíca' 'asta na'aj quee huataséjre'en a'íjna

ì xú'ra'vej tí'ij tapuá'risima'caj uje'ejnynyii, tí'ij jamuaatyátatzavi'tye'en.

<sup>20</sup> Ajta anaqueéj a'yan tyúuxie've' siaj jáamua'reej tiquee a'tíj a'náj jusíj je'ej tyéejtyoj je'ej tí huatóomua'aj a'íjna ì nyúucarij tí jitzán á'yu'si'ij ì yu'xarij je'ej maj tyu'taxájtaca' a'íimaj ì maj Dios jitze ma'can tyí'xajtaca'aj,

<sup>21</sup> jí'nye a'íimaj ì maj Dios jitze ma'can tyí'xajtaca'aj, camu a'náj a'yan tyu'taxájtaca' je'ej maj tyi'tíj jujímua'aj mana'aj tyí'ijtyoj, sulu Dios jitze ma'can mu a'yan tyu'taxájtaca', majta a'íjna jime' ì júuricama'ra' ì Dios.

## 2

### *A'íimaj ì maj hue'tzij jín tyihuá'mua'tyej*

<sup>1</sup> Jéehua mu majta ì tyeítyee huataséjre'ej a'íjma jimi ì maj Israel jitze ajtyáma'can, ì maj hue'tzij jín tyihuá'mua'tyej, a'íj mu jín jéehua ja'mua jimi séejre' a'íimaj ì maj hue'tzij jín tyaja'muamua'tyej. Avíitzij mu jín a'yan ricij mua'ajmaj jimi, a'yaa mu mij a'íjna jamuajo'riésij, majta jatyáhue'tacaa ì tavástara' a'íjna ì tí ajta hua' jime' tyu'nájchitaca', a'íj pu jín a'yan tyihuá'ci'tyij tí ì Dios jíye'tzín hua'antypuá'ritye'en.

<sup>2</sup> Mue'tíj mu hua'rá'astijre'ej mej mij a'yan cha'taj mana'aj tyityahuóoxana'cire'en matí'ij a'íimaj, a'yaa mu mij a'íjna jín je'ej pua'aj tya'xáataj muá'ju'un a'íjci ì nyúucarij tí xá'puí'.

<sup>3</sup> A'yaa mu a'íjna jín hue'tzij tyihua'mua'tyáaj muá'ju'un a'íjna jime' maj huápuí'ij jaxie've' ì túmii, a'yaa mu mij a'íjna jín tyitye'entyipuá'rij

ti'ij Dios huo'xíjtye'en, ji'nye pu'rij á'tyeej ti a'yan a'íimaj jimi tya'tácatyiij.

4 Capu i Dios tyihuo'tú'uunyi'ri' a'íimaj i maj tajapuá tyí'huíiria'ca'aj, i maj tyi'tíj jin ootyá'itzee, sulu a'áa pu huaja'tyáahua'xij jo'maj yá'puejtzitaren, ajta ja'tyácun mej mij a'áa já'nami'huaj jo'tíj jo'tíca', a'áa mu ja'avíitzi'huaj muá'ju'un, 'asta na'aj quee Dios huo'xíjtye'en a'ájna xicáara' jitze ti'ij jitzán néijmi'i tye'entyipua'rij.

5 Capu ajta tyihuo'tú'uunyi'ri' a'íimaj i maj ará'tyeej séjria'ca'aj, sulu a'yaa pu tyu'tá' ti i jájtyij tyí'jistej néijmi'que' i cháanacaj japua, ti'ij puéjtzij huo'tá'an a'íijma i maj quee já'astijria'ca'aj i Dios, ajta a'íi pu xaa huáhuíi i Noé, i ti a'yan tyihuo'té'exaaj je'ej maj huárinyij mej mij xá'puí' huárinyij i Dios jimi, ajtáhua'aj a'íimaj i séecan i maj aráahua'puaj ará'axcaa.

6 Dios pu ajta huo'xíjtyej a'íijma i maj a'áa jo'cháatima'caa i chájta'naj jitze ti a'yan tyaja'rájtyapuaaj tijin Sodoma ajta a Gomorra, néijmi'caa pu huatyáatiej, mej mij a'íjna jin jáamua'reej je'ej ti tyihuá'uuren a'íijma i maj quee já'astijre' i Dios.

7 Ajta a'íj pu japua huatanyúj a'íjci i Lot, i ti tyámua' tyi'tyúucha'íica'aj, ajta je'ej pua'aj ja'axcaa je'ej maj rijcaj i maj juxana'caria'ca'aj a'íimaj i maj quee tyi'tíj já'astyajca'aj.

8 A'íjna i tyéviij ti tyámua' tyi'tyúucha'íica'aj i Dios jimi, jéehua pu jajpuéjtzica'aj i jutzájta' a'íjna jime' maj quee xá'puí' rijcaa ji'nye a'yaa pu tyí'sejraca'aj, ajta tyi'namuajraca'aj i maj

je'ej pua'aj rijcaa a'íimaj i maj quee tyi'táj já'astyajca'aj.

<sup>9</sup> Tavástara' pu jaayí'tin ti hua' japua hu-atányuunyij tyi'táj maj jin jajpuéjtzij a'íimaj i maj jimi séejre', ajta jaayí'tin ti hue'tyáanaj a'íjma i maj je'ej pua'aj tyityetyúucha'ij, ti'ij puéjtzij huo'tá'an a'ájna xicáara' jitze ti jitzán néijmi'caa á'xijtye'en.

<sup>10</sup> Tavástara' pu ajta puéjtzij huo'tá'sij a'íjma i maj huápui'ij je'ej pua'aj ricij, majta quee tyi'táj já'astijre'. Camu tyi'táj ja'astej majta óoca'nyej maj cha'mana'aj tyi'táj jin je'ej pua'aj huárinyij, camu majta tyí'tziinye' mej mij je'ej pua'aj tyi-huá'xajtaj a'íjma i maj tajapúa já'sejre',

<sup>11</sup> majta a'íimaj i maj tajapúa tyí'huüre', tyij majta jéetze' juca'nyej majta jéetze' va'cán jin antyúumua'reej, camu a'yan tyityóoca'nyej mej mij je'ej pua'aj tyihuá'xajtaj a'íjma i tyétyacaa a'ájna jimi i tavástara'.

<sup>12</sup> A'íimaj i tyétyacaa a'yaa mu een mati'ij i ya'muáatyee: camu tyihuojó'itej, majta cha'mana'aj jo'ojuhua'an, a'yaa mu een jin huanánie'huaca' mej mij huo'vívi', majta je'en huó'cui'nyij. Je'ej mu pua'aj tyá'xaj i tyi'táj maj quee yó'itej, ajta a'yaa mu cha'taj mana'aj tyí'tyacui'nyij mati'ij a'íimaj i ya'muáatyee,

<sup>13</sup> a'yaa mu mij majta tya'ajpuéetzij muá'ju'un mati'ij a'íimaj séecan puéjtzij tyu'tá'. A'yaa mu tyityóomuajtyej maj tyi'táj jin jutyamua've', a'yaa mu mij ricij tújca'rij tzajta'. Jéehua xu tyévi'si' séejre' a'ájna jime' je'ej siaj tyi'táj jin ricij hua' jamuán, mati'ijta tyí'ye'estyaj, ji'nye

a'íj mu jín jutyamua've' i maj jime' jujímua'aj jucuanamuj.

14 Camu pújoorej maj íitaj huaséj majta je'en quee jaatanyá'cua'aj, camu a'náj ja'antyápua'citaca maj á'itzeeria'aj i Dios jimi. Ca'nyíjra'aj mu hua'tá'caa a'íjma i maj quee jéehua juca'nyej mej mij majta tyi'tíj jín je'ej pua'aj huárinyij, jéehua mu jaayí'tin je'ej maj tyi'tíj jín huárinyij, a'íi mu a'ín pué'een i tyeítýee i Dios ti puéjtzij huo'tá'sij.

15 Mu'ríj jo'vátzij, jí'nye mu'ríj ajtacíj i juyéj jítze ti tyámua' een. A'yaa mu mij ricíj tí'ij a'íjna i Balaam, yójra' a'íjci i Bosor, i ti a'yan tyá'xie'va'ca'aj ti túmii huamué'tin a'íjna jime' ti je'ej pua'aj ricíj,

16 ajta a'yaa pu je'ej tyo'tóomua'aj a'íjna jime' ti je'ej pua'aj rijcaa, tí'ij i púuru' tíquee tyo'ríi'rej a'yan tyaaté'exaa tí'ij tyévij, ajta je'en jaatá'ijmuejri' tí'ij quee tyi'tíj jín je'ej pua'aj rijcaj a'íjna jime' i ti jutímue'.

17 A'íimaj i maj a'yan ricíj a'yaa mu een tí'ij jo'tíj ja'tyácun ajta je'en quee arájmuua, nusu tí'ij i jéetirij ti áacaj jáatajchi, a'yaa pu tyihuá'ci'tyij maj a'áa jo'tyá'itzeere'en jusén jime' jo'tíj huápuí'ij jo'tíca'.

18 A'yaa mu a'íjna jín tyí'xaj i nyúucarij tíquee tyi'tíj je'ej tyí'xaj, majta ca'nyíjra'aj hua'tá'caa i séecan mej mij tyi'tíj jín je'ej pua'aj huárinyij a'íimaj i maj moochán jaatapuá'citaca', i maj je'ej pua'aj tyityetyúucha'íica'aj.

19 A'yaa mu tyihuá'ixaatye' maj juxáahuaj séeria'aj muá'ju'un, majta jujímua'aj ca'nyéjrij

jìn tyí'huíire' a'íjna jìme' maj je'ej pua'aj tyi-tyetyúucha'ij, jì'nye a'táj tìna'aj tì ca'nyéjrij jìn tyí'huíire', a'í pu a'yan tyá'huíire' je'ej tì tyí'táj arí tyeetyáamue'tij.

<sup>20</sup> Jì'nye a'íimaj i maj meríj jaamua'aj a'íjci i tavástara' Jesús i tì ajta Círístu' pué'een, a'íimaj mu meríj ajtacíj a'íjci jitze i tì je'ej pua'aj tyí'een íyan cháanacaj japua, tipua'aj ajtáhua'aj huo'tyámue'tin a'íjna i tì je'ej pua'aj een, jéetze' mu je'ej pua'aj rinyij mequee jájcuaj.

<sup>21</sup> Jéetze' pu tyámua' tacaj maj quee a'náj jáamua'tyijche' a'íjci i juyéj tì tyámua' een, mej mij quee a'yan tyá'mua'reeriaj majta je'en yo'huá'xij a'íjci i nyúucarij tì tyámua' een tì ajta hua' jimi huatyátuiihuaca'.

<sup>22</sup> A'yaa pu'ij a'íjma jimi tya'raj je'ej tì tyé'yu'si' i yu'xarij jitze tì a'yan tìjìn: “A'íjna i tzi'ij, ajtáhua'aj pu pu'ájvej tì'ij jáacua'nyij i jujárie'rij”, ajta i tì a'yan tìjìn: “A'íjna i tuíxuj i maj tyámua' tya'cáajo'sij, ajtáhua'aj pu i jáxu'uj jitze átyi'huaxi'ij.”

### 3

#### *A'náj tì ajtáhua'aj yatanyésij i tavástara'*

<sup>1</sup> Nye'ihuáamua' mu nyaj já'muaxie've', a'í pu a'ín pué'een i yu'xarij tì hua'puaj i nyaj jitzán tyajá'muayu'se'ej. A'yaa nu a'íjci jìme' i tì hua'puaj tyá'xie've' nyej nyij ca'nyíjra'aj jamuaata'an siaj sij tyámua' tyú'mua'tyij.

<sup>2</sup> Xo'támua'reej je'ej maj ará'tyeej tyu'taxájtaca' a'íimaj i maj Dios jitze ma'can tyí'xajtacaj, siajta a'íjci i nyúucarij i tì



jamuaatá' a'íjna i tavástara', ti ajta a'íin pué'een i ti ja'mua japua huatányuusij, a'íi pu a'íin pué'een i nyúucarij ti ityájma jimi jaatyájtoo, tyej tyij jamuaaté'exaatye'en.

<sup>3</sup> Siata'aj tyámua' tyá'mua'reeriaj ti a'yan tye'mej, a'ájna xicáara' jitze ti jitzán néijmi'i tye'entyipué'rij, a'íi mu huataséjre'ej i tye'ityee i maj jamuá'xaahuari', je'ej ti a'íimaj tyihua'ráanajchi i ti je'ej pua'aj een,

<sup>4</sup> a'yaa mu tyu'ta'íhuo'sij tijin: “¿Ji'nye tyi'tíj huaríj a'íjna jime' ti i Ciriístu' ajtáhua'aj ya'uvé'nyesij? Mu'ríj huácuij i tahuásimua'ci'ij, ajta a'yáana'aj óoche' tyí'sejre' i cháanacaj ti'ij jájcuaj imuáj tyu'tyátaavijhuaca'.”

<sup>5</sup> A'íimaj i tye'ityee camu jaxie've' maj jo'támua'reej ti i tajapué' arí jájcuaj imuáj séjria'ca'aj, ajta i cháanacaj a'yan tyu'séjrej ti'ij i Dios junyúuca jín tyu'ta'íjtaca', ti'ij ajnyéj a jáata', ajta ijíj a'yan tyí'sejre' i jájtyij japua.

<sup>6</sup> A'yaa pu ajta jájtyij jín tyu'tyá'uunyi'huaca' i cháanacaj a'ájna imuáj.

<sup>7</sup> Ajta i tajapué' ijíj ti séejre' ajta a'íjna i cháanacaj i tyaj a'yan japuan ijíj a'yan séejre', Dios pu jacha'ij ti'ij jaatyáteeraj. A'íi pu i tiéj hua'antypua'ritye'sij a'ájna xicáara' jitze ti jitzán huá'xijtye'en i junyúuca jime', ajta néijmi'caa jo'riésij a'íimaj i tye'ityee i maj je'ej pua'aj tyityetyúucha'ij.

<sup>8</sup> Siata'aj quee yó'hua'nán, nye'ihuáamua' ti i tavástara' jimi séej xicáj a'yan een ti'ij séej ví'ra'aj nyinyi'ra'aj, ajta séej ví'ra'aj nyinyi'ra'aj a'yan een ti'ij séej xicáj.

9 Capu a'yan huatóomua'aj ti i tavástará' á'tyeeren ti'ij a'yan huárinyij je'ej ti tya'tóoraj, mati'ij séecan tyí'mua'tzej, sulu tyámua' pu tyé'viicue' ja'mua jimi, ji'nye capu jaxie've' ti a'tíj jó'vetyij, sulu mej mij néijmi'i tyá'antzaahuatye'en i Dios jimi.

10 Ajta i tavástará' a'yaa pu tyo've'nyesij ti'ij i náhua'rij ti avíitzij jin huataséjre'ej i tíca'rij tzajta'. Aj pu'ij i tajapuá ti séejre' huatyú'uunyi'huaj, ca'nyíin pu jin je'ej pua'aj huápu'i'ij huatánamuajre'ej, ajta néijmi'i i ti tyú'taavijhuaca' ajta pu tye'entyipué'rij a'íjna jime' i tiéj, ajta i cháanacaj, jamuán i ti japuan tyí'sejre' a'íi pu tyu'tyátaasij.

11 Ji'nye néijmi'i pu a'yan tyu'tyú'uunyi'huaj, a'yaa pu'ij tyúuxie've' siaj tyámua' tyi-tyetyúucha'íij, siajta néijmi'i jin ja'rá'astijre'en i Dios.

12 Siata'aj jajchó've'ej a'náj ti xicáara' jitze uvé'nyesij i Dios, siajta néijmi'i jin tyámua' eenye'. Ji'nye a'ájna xicáara' jitze, a'íjna i tajapuá néijmi'i pu huatyú'uunyi'huaj i tiéj jime', ajta i ti tyú'taavijhuaca' ti'ij ajta jamuán tyí'sejre', a'íi pu ajta néijmi'i tyu'tyátaasij,

13 tyajta ityáj a'íj tu tyicho've', i tajapuá ti jájcuaj tyajta i cháanacaj ti ajta jájcuaj, a'yájna ti'ij i Dios tya'táraj, ajta néijmi'i tyámua' tyi'éenye'ej ta'mej.

14 A'íj xu jin nye'ihuáamua' mu nyaj já'muaxie've', ijíij siaj siooj a'yan tye'ejchó've', siata'aj tyámua' eenye' i Dios jimi, siaj sij quee tyi'tíj jin á'itzeeria'aj.

15 Siata'aj a'yan tyá'mua'reeriaj ti a'íjna jin já'muacho've' i Dios ti'ij néijmi'caa táahuire'en. A'íj pu ajta jin tyajamuaatayú'sej a'íjna i ta'ihuáara' Pablo i tyaj jaxie've', Dios pu a'yan tyaatá' ti'ij yo'itéej já'ra'nyij tyámua' naa.

16 Néijmi'i i ti jitzán tyajamuaatayú'sej a'yaa pu cha'tána'aj tyajamuáa'ixaa, tyij ajta je'caquéj muárie'rij ti a'tíj yo'itéej já'ra'nyij i nyúucarij, a'íj mu jin séecan i tyeítyee i maj quee tyi'tíj mua'reej i maj majta quee xu jéehua tyé'viicue' i maj jin tyá'tzaahuatye' a'yaa mu mij a'íjna jin tyí'tyese' mej mij seequéj tyiyo'itéej muá'ra'nyij, a'íj mu mij seequéj ja'uurej i nyúucarij, a'íj mu mij jin jujímua'aj antyúupua'ritye'sij.

17 A'yaa pu'ij nye'ihuámua' mu nyaj já'muaxie've', mua'aj xu seríj jamua'reej, siata'aj sij tyámua' tyityahuóocha'ín, mej mij quee tyi'tíj jin jamuáacuanamuaj a'íimaj i maj je'ej pua'aj tyí'tyetyeityee, nusu siaj sij a'yan huárinyij je'ej maj a'íimaj tyí'ijta.

18 Siajta mua'aj siata'aj jéetze' tyámua' tyáamua'tyij a'íjci i tavástara' ti ajta Ciriístu' pué'een, siata'aj a'íjna jin huahuóose'en i siaj jin huóoxie've'en. Tyiche' a'náj tina'aj tyé'tyojtzi're'ej. Che' a'yan tyá'ra'nyij.

**Cora, Santa Teresa**  
**Cora, Santa Teresa: I nyúcarij ti jájcua ti a'ijna**  
**á'xaj i Tavástara' i Jesús ti Ciríistu' pue'een ajta**  
**Salmos New Testament+**

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2025-05-01

---

PDF generated using Haiola and XeLaTeX on 30 Apr 2025 from source  
files dated 1 May 2025

4f03662f-a4e0-5c7c-a13b-0b7002b5b8f6